



KEMENTERIAN KERJA RAYA

KENYATAAN MEDIA

PEMBUKAAN SEKSYEN 2 LEBUHRAYA PESISIRAN PANTAI BARAT (WCE) MEMUDAHKAN PENDUDUK BANTING KE SHAH ALAM, PUTRAJAYA DAN KLIA

SHAH ALAM, SELANGOR – Seksyen 2 Lebuhraya Pesisiran Pantai Barat (WCE) dari Persimpangan Bertingkat SKVE ke Persimpangan Bertingkat SAE dibuka kepada pengguna lebuhraya bermula Rabu, 22 Januari 2025 jam 12:01 tengah malam.

2. Bahagian lebuhraya yang dibuka ini melibatkan jajaran sepanjang 7.2 kilometer dan pengguna kini mempunyai laluan alternatif yang lebih mudah dari Banting menuju ke Shah Alam, Klang, Putrajaya, Kajang, Lapangan Terbang Antarabangsa Kuala Lumpur (KLIA) dan sebaliknya dengan sambungan terus ke Lebuhraya Lembah Klang Selatan (SKVE) dan Lebuhraya Shah Alam (KESAS).

3. Pembukaan jajaran ini akan melengkapkan jajaran yang telah dibuka sebelum ini dari Persimpangan Bertingkat Banting ke Persimpangan Bertingkat SKVE yang telah dibuka pada 31 Ogos 2024 yang lalu. Pembukaan kedua - dua jajaran ini akan mempercepatkan perjalanan dari Shah Alam ke Banting atau KLIA berbanding menggunakan jalan sedia ada, sekali gus memberi impak positif kepada mobiliti penduduk dan aktiviti ekonomi di kawasan tersebut.

4. Dengan adanya jaringan perhubungan lebuhraya yang lebih baik ini dijangka menarik pelaburan ke kawasan perindustrian sedia ada seperti Pulau Indah, Telok Panglima Garang dan Bandar Botanik serta merangsang sektor industri dan komersial di sepanjang koridor ini. Selain daripada meningkatkan kelancaran pergerakan, Lebuhraya WCE turut menyediakan sambungan strategik ke Pelabuhan Klang yang bakal memanfaatkan sektor pengangkutan kargo.

5. Pembukaan jajaran ini merupakan sebahagian daripada Lebuhraya WCE sepanjang 314.5 kilometer yang akan menghubungkan Banting di Selangor hingga ke Taiping di Perak. Dengan siapnya lebuhraya ini, WCE akan menjadi antara pemangkin utama dalam pembangunan dan pertumbuhan ekonomi, khususnya di sepanjang koridor barat Semenanjung Malaysia, meningkatkan aktiviti pelancongan domestik di samping di harap akan mengurangkan kesesakan di lebuhraya utama jajaran lembah kelang ke utara semenanjung.

6. Kementerian Kerja Raya (KKR) berharap WCE membuat promosi akan laluan alternatif ini agar pengguna maklum untuk menggunakannya bagi menyuraikan masalah kesesakan di lebuhraya. KKR juga menganjurkan kepada pengguna lebuhraya untuk memanfaatkan kemudahan lebuhraya ini dengan sebaiknya disamping mematuhi peraturan jalan raya dan memastikan keselamatan diri, keluarga serta pengguna lain sentiasa terpelihara semasa memandu di lebuhraya terutama menjelang musim perayaan Tahun Baru Cina.

#Tamat#

DATO SRI ALEXANDER NANTA LINGGI
MENTERI KERJA RAYA
21 JANUARI 2025